

研律集

廿八自述，用飛雁入群格

青春寥落案書圍，彩筆慚爲俗所羈。談夢不離生老病，處心多執愛嗔癡。
唯嚙血淚臻佳境，漸斂性情工鈍辭。世事由來風雨半，詩懷每在晦晴時。

感懷

冷暖交情久見真，難摧壘塊爽精神。官商媚俗名遮眼，朝野爭鋒島吃人。
只信著書能避世，未聞貪韻可療貧。何嘲尺蠖無風骨，舉目卑微解屈伸。

初夏夜遊和美山

暮鎖群峰夕照沉，修林策策動芳音。蟬吟自在銷殘暑，蛛網無端縈冷金。
螢色參差春夢老，詩懷跌宕月華深。憑風欲挽天河水，洗澈塵寰泥滓心。

埔里食李仔哥爌肉飯

東西車轍滿庭門，膾肉餘香共酒樽。孰以聞韶輕食指，休因彈鋏瘦詩魂。
小鮮平易猶珍饈，大味尋常在草根。老幼怡然同宴樂，方知朝市亦桃源。

研究室望雨

潑墨雲濤渲未央，過庭秋雨喚新涼。滴階珠玉勝琴韻，沾露履裙黏草香。
錯落傘擎天黯淡，寂寥燈點樹微茫。憑窗已感孤吟慣，莫向思量問短長。

研究室夜歸

時從契友任優遊，閑話詩書半避愁。窗冷龍蛇浮魅影，宵深雀鷺鎖鬢樓。
溺途終返心初處，養晦頻望夢盡頭。襲面冬風猶料峭，閑雲掃徹一天秋。

兵役專訓澄清湖畔，憶少曾習詩於此，感而作

重訪經年景亦佳，湖波激灑接雲涯。少從詩課今戎課，夙出軍差夜筆差。
因惰豐來多髀肉，隨愁淡去半吟懷。一風樹色猶澄碧，吹入夢中傳習齋。

軍中夜哨，未聯用拗

無邊萬籟闇深沉，真感乾坤歸一心。燥溽褪餘霜月見，喧囂罷盡草蛩吟。
殘星冷落如相語，半盞清閒且自斟。遙憶窗前擁衾日，香溫共此夜森森。

碧潭晚步，頸聯、未聯用拗

碧灣霞色斂爛斑，漸漫宵氛鎖翠鬟。鷺不心羈超物表，我唯癡執寄人間。
千年月桂自開謝，萬里星槎誰泛還。莫道功名及時貴，只留情意屬雲山。

讀詩懷人

數年重揀藥樓詩，師豈罪吾迫挽遲。無理接縫生妙趣，多情截搭入新詞。
權除螢幕千江水，漫煮茶鐺一縷絲。料想山潭依舊碧，唯餘人境異當時。

感師榮退

慣聽松濤自在吟，重來倍覺沐恩深。雖微進篔終成嶺，尚健抽芽久疊陰。
矻矻始思謙傲氣，諄諄屢愧斂酸心。幾人衣鉢能過海，盼與同門再滿斟。
頸聯，先生時囑應當收斂文人酸傲之氣。

訪暨南大學詩寄胞弟

叩戶青茵遞淡香，莫勞書牘負春光。學遊雲外逍遙地，醒醉人間傀儡場。
涉世始開中歲境，思親漸減少年狂。縱然星歲如晞露，也繫真情駐夕陽。

重過淡江懷前女友

分手關心動數年，而今獨眺月明天。曾經燈火闌珊處，直到江潮汨沒邊。
絕別始知因小事，相逢孰悟是前緣。夢中唯願松濤舊，吹盡無端一悵然。

夜夢前女友得舊事經年入夢頻句醒而後作，用飛雁入群格

纏綿回首等浮雲，舊事經年入夢頻。別後強顏皆俗物，醒來著淚是痴人。
先時軫慨知非假，深處衷情道不真。兩袂愈行歧路遠，青春難捨化緇塵。

再以舊事經年入夢頻句作詩一首

舊事經年入夢頻，猶知幻境假參真。掬回山海眉邊月，化作詩騷紙上塵。
世媚功名輕素志，誰窮書典共青春。狂如我輩稀知己，天下至情酬幾人。